

आकाशवाणी

Headlines

- प्रधानमंत्री नरेन्द्र मोदी होर अज्ज विकसित भारत आस्तै प्रोद्योगिकी सुधार ते वित्त पर वेबिनार गी वीडियो कांफ्रेंसिंग राएं सम्बोधित करडन।
- राष्ट्रपति द्रौपदी मुर्मू होर राजस्थान दे जेसलमेर च भारतीय वायु सेना दा वायु शक्ति अभ्यास दिक्खडन। ओह 2 दिन दे राजस्थान दौरे पर न।
- राष्ट्रवादी कांग्रेस पार्टी नै महाराष्ट्र दी उपमुख्यमंत्री सुनेत्रा पवार गी सबनें दी सहमति कन्नै पार्टी दा राष्ट्रीय अध्यक्ष चुनी लैता ऐ।
- कनाडा दे प्रधानमंत्री मार्क कार्नी अज्जै थमां 2 मार्च तगर भारत यात्रा पर रौहडन। अपने दौरे दौरान ओह प्रधानमंत्री हुंदे कन्नै मलाटी करडन।
- अफगानिस्तान नै कल रातीं पाकिस्तान पर जवाबी हमला कीता। इस हमले च 55 पाकिस्तानी सैनिक मारे गे।
- आई.सी.सी. टी-20 क्रिकेट विश्व कप दे सुपर-8 मुकाबले च कल भारत नै जिम्बाब्वे गी 72 रन्ज कन्नै हराया। हुन भारत दा अगला मुकाबला ऐतवारें वेस्ट इंडीज कन्नै होगा।

<><><><><><>

PM Webinar

प्रधानमंत्री नरेन्द्र मोदी अज्ज विकसित भारत आस्तै प्रोद्योगिकी सुधार ते वित्त पर वैबिनार गी वीडियो कांफ्रेंसिंग राएं सम्बोधित करडन। बजट दे मगरा आयोजित होने आहले इस वैबिनार च सार्वजनिक पूंजी खर्च- बुनियादी ढांचे- बैंकिंग सैक्टर सुधार- माली सैक्टर प्रबंधन- पूंजी बजारें दी मजबूती ते कर-सुधारें राएं जीवन गी सखल्ला बनाने जनेह विशें पर विचार-विमर्श होगा। केन्द्रीय बजट 2026-27 दे प्रमुख विषयें पर बजट मगरा आयोजित होने आहले वैबिनार दी श्रृंखला च एह पैहली ऑनलाईन संगोष्ठी ऐ। इनें संगोष्ठियें दा मकसद पिच्छले अनुभवे थमां लाह ठोआना ते प्रतिभागियें दी प्रतिक्रिया हासिल करना ऐ- तां जे व्यवहारिक अनुभव दे आधार पर बजट घोषणाएं दी असरदार ढंगे सिर अमलावरी यकीनी बनी सकै। वैबिनार च उद्योग जगत- माली संस्थान- बजार- सरकार ते शिक्षा जगत दे प्रतिनिधि हिस्सा लैडन।

<><><><><><>

Prez Rajasthan

राष्ट्रपति द्रौपदी मुर्मू होर अज्ज राजस्थान दे जैसलमेर च भारतीय वायु-सेना दा वायु शक्ति अभ्यास दिक्खडन। राष्ट्रपति होर राजस्थान दे 2 दिन दे दौरै पर कल संजा जैसलमेर पुजियां हियां। रक्षा मंत्रालय मूजब वायु शक्ति अभ्यास सोयां पैहले ओह स्वदेशी हलके लड़ाकू हेलीकाप्टर “प्रचंड” च डोआरी भरडन। “प्रचंड” हेलीकाप्टर स्वदेश च विकसित ते तयार मुख्य दा पैहला लड़ाकू हेलीकाप्टर ऐ। हिंदोस्तान एयरोनोटिक्स लिमिटेड नै एदा विनिर्माण कीते दा ऐ। राष्ट्रपति मुर्मू होर अज्ज संजा भारत- पाकिस्तान बन्ने कश पोखरन फायरिंग रेंज सोयां भारतीय वायु सेना दा वायु-शक्ति प्रदर्शन दिक्खडन। इस दौरान भारतीय वायु-सेना दे बक्ख-बक्ख जहाज अपनी परिचालन क्षमता गी प्रदर्शित करडन। रक्षामंत्री राजनाथ सिंह ते राजस्थान दे मुखमंत्री भजन लाल शर्मा बी कार्यक्रम च मौजूद रौहडन।



Sunetra Pawar

राष्ट्रवादी कांग्रेस पार्टी नै महाराष्ट्र दी उपमुखमंत्री सुनेत्रा पवार होरें गी सबनें दी सैहमति कन्नै पार्टी दा राष्ट्री अध्यक्ष चुनेया ऐ। कल मुम्बई दे वर्ली च राष्ट्रवादी कांग्रेस पार्टी दे राष्ट्री अधिवेशन च एह फैसला लैता गेआ। पार्टी नै सुरगवासी अजीत पवार हुंदे पुत्र पार्थ पवार गी राज्यसभा चुनाऽ लेई पार्टी दा मेदवार घोशत कीता। नमीं चुनी गेदी पार्टी अध्यक्ष सुनेत्रा पवार होरें सोशल मीडिया पोस्ट च पार्टी दे वरिष्ठ नेताएं, ओहदेदारें ते कार्यकर्ताएं दे प्रति आभार व्यक्त कीता। उंनं आखेआ जे करसान, उंदी पार्टी दी बचार-धारा दे केन्द्र च न ते राष्ट्रवादी कांग्रेस पार्टी- कृशि गी लाहकारी बनाने लेई आधुनिक तकनीकें ते आर्टिफिशियल इंटेलिजेंस दा इस्तेमाल बधाने पर ध्यान केन्द्रित करोग।



Sri Lanka PM -India

श्रीलंका दी प्रधानमंत्री हरिनी अमर-सूर्या नै भारत कन्नै मजबूत बपारिक सरबंधें, उच्चे निवेश ते सैलानियें दी बधदी गिनतरी दा सुआगत कीता ऐ। उंनं भारत दे कन्नै सहयोग बधाने दी श्रीलंका दी वचनबद्धता दी तस्दीक कीती। भारत दे 77में गणतंत्र दिवस ते श्रीलंका दे 78में गणतंत्र दिवस दे उपलक्ष्य च आयोजित धाम च डाक्टर अमर-सूर्या होरें आखेआ जे श्रीलंका, भारती बवसायें दे कन्नै सरबंध बधाने ते सैलसफा दे राहें लोकें बश्कार आदान-प्रदान गी बढावा देने दा उत्सुक ऐ।

श्रीलंका इंडिया सोसायटी दे इस कार्यक्रम च राजदूतें- बवसायियों ते भारती समुदास दे लोकें हिस्सा लैता। डाक्टर अमर-सूर्या होरें भारत गी श्रीलंका दा सबनें शा नेडमा सैहयोगी करार दिता ते चुनौतीपूर्ण समें च भारत दे लगातार सहयोग ते समर्थन दे प्रति आभार प्रगट कीता। उंनें आखेआ जे उं'दी सरकार आर्थिक, सांस्कृतिक ते समाजी खेत्तर च दपक्खी सहयोग बधाने लेई वचनबद्ध ऐ।

<><><><><><>

Voter List Publication

सुप्रीम कोर्ट दे निर्देश पर पच्छिम बंगाल कल अपूर्ण अंतिम मतदाता सूचि गी जारी करोग। एदे च उं'नें मतदाताएं दे नाऽ बी शामिल होडन जिंदा खास नजरसानी आहली प्रक्रिया- एस.आई.आर दे तैहत दस्तावेज ते दिती गेदी जानकारी दा अजें सत्यापन होना बाकी ऐ। निर्वाचन आयोग दे सूत्रें दे मूजब एस.आई.आर प्रक्रिया दी शुरुआत च राज्य च 7 करोड़ 66 लक्ख थमां मते मतदाताएं दे नाऽ हे। एदे च लगभग 58 बक्ख फर्जी- लापता- इक थाहर थमां चली गेदे ते मृत मतदाताएं दे नाऽ मसौदा सूचि थवां पैहले गै हटाई लैते गेदे ना। बाकी 7 करोड़ 8 लक्ख मतदाताएं दे नाऽ खीरी सूचि च शामिल होडन। चुना आयोग नै मुखमंत्री ममता बैनर्जी हुंदा एह दावा खारिज करी दिता जे अंतिम सूचि सोयां इक करोड़ 20 लक्ख मतदाताएं दे नां हटाए जाई सकदे ना। राज्य दे मुख चुनां अधिकारी मनोज कुमार अग्रवाल होरें साफ कीता जे मतदाता सूचि सुप्रीम कोर्ट दे निर्देशें मूजब जारी कीती जाग।

<><><><><><>

Canada PM -Visit

कनाडा दे प्रधानमंत्री मार्क कार्नी अज्जै थमां 2 मार्च तगर भारत दी यात्रा पर रौहगंन। प्रधानमंत्री कार्नी दी एह भारत दी पैहली आधिकारिक यात्रा ऐ। विदेश मंत्रालय नै दस्सेआ जे प्रधानमंत्री कार्नी अज्ज मुम्बई पुजडन ते अगले 2 दिन तगर व्यावसायिक संगोष्ठियें च हिस्सा लैडन। कार्नी होर उद्योग जगत ते माली माहिरें दौनें मुल्खै दे मुख कारजकारी अधिकारियें, नवाचारियें ते भारत स्थित कनाडाई पेंशन निधि अधिकारियें कन्नै गल्लबात करडन। प्रधानमंत्री कार्नी पैहली मार्च गी नमीं दिल्ली औडन। अगले गै दिन प्रधानमंत्री नरेन्द्र मोदी हुंदे कन्नै हैदराबाद हाऊस च उन्दी शिष्टमंडल स्तह दी गल्लबात होग। दवै नेता भारत- कनाडा कार्यनीतिक सांझेदारी दे बक्ख-बक्ख क्षेत्रें च होई दी प्रगति समीक्षा करडन ते प्रमुख क्षेत्रें च जारी सहयोग दा जायजा लैडन। ओह क्षेत्रीय ते वैश्विक घटनाक्रमें पर बी विचार-विमर्श करडन। एदे मगरा दवै नेता भारत-कनाडा मुख कारजकारी अधिकारी फोरम दी बैठक च हिस्सा लैडन।

स्थाडे संवाददाता नै दस्सेया जे कनाडा दे प्रधानमंत्री हुंदी एह यात्रा दपक्खी सरबंधें गी सामान्य बनाने दे जत्र च महत्वपूर्ण मौके पर होआ'रदी ऐ। दौने नेताएं बश्कार होने आहली बैठक कन्नै आपसी सांझेदारी मज़बूत करने च मदद थहोग।

<><><><><><>

IIMC 57 Convocation -VP

भारतीय जन संचार संस्थान IIMC दा 57मां दीक्षांत समारोह अज्ज नमीं दिल्ली च होग। समारोह च उपराश्ट्रपति सी.पी. राधाकृष्णन होर मुख्ख परौहने दे तौर पर शिरकत करडन। IIMC दे कुलाधिपति ते सूचना ते प्रसारण मंत्री अश्विनी वैष्णव समारोह दी अध्यक्षता करडन। IIMC दे सारे 6 परिसरें थवां बक्ख-बक्ख पाठ्यक्रमें दे शीर्ष छात्रें गी 23 नकद पुरुस्कार सनें 35 तगमे दिते जाडन। इस मौके पर उपराश्ट्रपति IIMC नमीं दिल्ली च नमें अकादमिक ब्लाक ते छात्रावास ब्लाक दा नींह पत्थर रक्खडन। सूचना ते प्रसारण मंत्री अश्विनी वैष्णव इनक्वूवेशनसैंटर च क्रिएट्स लाउंन दा उदघाटन बी करगंन।

<><><><><><>

Afghan- Pak

अफगानिस्तान नै कल रातीं पाकिस्तान पर जवाबी हमला कीता। इस हमले च 55 पाकिस्तानी सैनिक मारे गे। किश दिन पैहले गै पाकिस्तान नै अफगानिस्तान दे सीमावर्ती क्षेत्रें च हवाई हमले कीते हे। अफगानिस्तान दे रक्षा मंत्रालय आसेआ दस्सेया गेआ ऐ जे जवाबी हमले च- पाकिस्तानी सेना दी 19 चौकियें ते 2 सैन्य ठिकाने पर कब्जा करी लैता गया ऐ। अफगानिस्तान नै पक्तिका- खोस्त- नांगरहार- कुनार ते नूरीस्तान कश पाकिस्तानी सैनिकें गी निशाना बनाया। अफगानिस्तान दा दावा ऐ जे 4 घैंटें दे इस अभियान च तय लक्ष्य हासिल कीते गे ते भारी मात्रा च विस्फोटक ते हथियार जब्त कीते। अफगानिस्तान नै दस्सेआ जे इस अभियान च ओदे 8 सैनिक मारे गे ते 11 घायल होए। एदे मगरा पाकिस्तान नै काबुल-कधार ते पक्तियां च किश थाहरें पर हमले कीते- अफगानिस्तान नै आखेआ जे इस हमले दा बी करारा परता दिता जाग।

<><><><><><>

India-Pak UN

भारत नै जिनेवा च लग्गे दे संयुक्त राष्ट्र मनुक्खी अधिकार कौंसल दे 61में इजलास च जम्मू-कश्मीर बारे कीती गेदी टिप्पणियों गी खारिज करदे होई पाकिस्तान गी करार जवाब दित्ता ऐ। 23 फरवरी थमां 31 मार्च तोड़ी चलने आहले इस इजलास च परते दे अपने अधिकार दा इस्तेमाल करदे होई जिनेवा च संयुक्त राष्ट्र च भारत दे स्थायी मिशन दियें प्रथम सचिव अनुपमा सिंह होरें आखेआ की जेकर जम्मू-कश्मीर च पिच्छले बरे चालू कीता गेदा दुनिया दा सबनें शा उच्चा चनाऽ रेल पुल फर्जी ऐ तां पाकिस्तान दी बुद्धि भ्रष्ट होई गेदी ऐ ते ओ सुखने दी दुनिया च रवा करदा ऐ। उनें आखेआ जे जम्मू-कश्मीर च रिकार्ड गिनतरी च होए दा मतदान इस गल्लै दा सबूत ऐ जे लोकें आतंकवाद गी नकारी दिते दा ऐ ते ओ विकास-बाढ़े ते लोकतंत्र दी बत्तै पर तेजिया कन्नै अग्गे बदा करदे ना। उनें आखेआ जे पाकिस्तान गी ए हजम नेंई होआ करदा जे जम्मू-कश्मीर दा विकास बजट पाकिस्तान गी हाल च गै अंतराष्ट्रीय मुद्रा कोष थमां थोए दे बेल-आउट पैकेज थमां दूना ऐ इस करियै पाकिस्तान बे-सिर-पैर दियां गल्लां करियै भारत दे खिलाफ झूठा प्रचार करा करदा ऐ।

<><><><><><>

Cricket

चेन्नई च आई.सी.सी मर्दे दे टी-20 क्रिकेट विश्व कप सुपर-8 मुकाबेल च कल भारत नै जिम्बाब्वे गी 72 रन्ज कन्नै हराई दित्ता। पैहले बल्लेबाजी करदे होई भारत नै 4 विकटें दे नुकसान पर 256 रन्ज बनाए। 257 रन्ज दे लक्ष्य दे परते च जिम्बाब्वे दी टीम 6 विकट पर 184 रन्ज गै बनाई सकी। जिम्बाब्वे दे ब्रायन बेनेट नै सबनें थवां मते 97 रन्ज बनाए। भारत दे अर्शदीप सिंह नै 3 विकट लैते। हार्दिक पंडया गी “प्लेयर ऑफ द मैच” घोषित कीता गेआ। भारत सुपर-8 दे अखीरी मुकाबले च ऐतवारे वेस्ट इंडिज कन्नै खेडोग। मैच संजा 7 बजे कोलकाता दे ईडन गार्डन्स कन्नै होग। कल अहमदाबाद च खेडु गेदे इक होर मैच च दक्खन अफ्रीका नै वेस्ट इंडीज गी 9 विकट कन्नै हराया।

<><><><><><>